

1 JON

Irapa Reoro Vo Vukuo Iava

Vo pasio rigatoreva Efesas urui-ia toupaoero aue 90 yia Jisas vaaro isivaaro iava kavaua. Uva voea rutupa oirao pie vovou irara vo rigato purareva. Ira varao iava siposipoara rigatoreva oara viapau vaeavira toupaveira oiso-ia, aviavia vao ora rupa (1 Jo 1:6-7, 2:8-11), rasito varaaropa ruipapaero ora Pauto varaaropa ruipapaero (1 Jo 2:15-17), Pauto voeaaro ovii irara ora Seten voeaaro ovii irara (1 Jo 3:4-10), siraopa vovou ora kasipupa vovou (1 Jo 3:11-18, 4:7-12, 16-21), Pauto reraaro Uraurato ora Kraiss-va keripato reraaro uraurato (1 Jo 4:1-3).

Goruvira rutu oirao pie vovou irara tavireva oiso ra viapau uvuipai ra kuuvu irara tisa irara vo siposiporoaro uvupaive. Voeao oea kuuvuvira siposiporo raga purapaiveira oiso, Viapau uvuipa Kraiss ra varaua-ia kavauro, uvare vo varaua oua-ia toupaveira oa agasipaveira aue-ia vuri pitupituro. Uva vo siposiporopa Jon goruvira oirao pie vovou irara tavireva, oiso ra viapau vara oirao piepaive voea oirao pie vovou irara (1 Jo 4:1-3).

1. Aviavi pie reoro vo pasio iava uvare oiraopa reo rutu oreoroa iava rigatoreva, 1:1-4.
2. Aviavia-ia vokapaero uvuipa Kristento ra ora rera vo vovouaro-ia oirao pie vovou taraiparo, 1:5–2:29.
3. Pauto vo vovouaro-ia kaviko vovou toupaoero uvuipa Kristento ra ora rera vo vovouaro-ia oirao pie vovou taraiparo, 3:1–4:21.
4. Uvuipa Kristento orekerovu vuriara-ia putepasa vo osa goruvira Kraiss-ia rari iraoparo, 5:1-12.
5. Pauto Oviitoaaro-ia taraipavio ira uvuipa vigei orirupasa vuri vovouro purapa arapa, 5:13-21.

Tootooa Vatepa Reoro Iava Ro-ia Jisas Kraiss

1 ^{1^a} Vao-ia oa oiso ragavira touva voari tuariri rutu rova-ia vo uva vo rasio pura asavira touva. Oa iava igei va uvuiovora, ora va kekeiovora vo ora igei osireiario iava. Ora va vuravuraiovora, ora va-ia tapo pitupituiovora ora igei vavaeoro iava vao-ia Tootooa Vatepa Reo.

^a 1:1 Jo 1:1, 14; 2 Pi 1:16; Jo 20:27

²Oire uva va-a vao Tootooa oa poeravira ora karekeepa, oa iava igei va kekeiovora. Uva oiraopavira va iava siposipopaiovora visiipa va iava vao-ia Tootoo Ovoi rutu. Oa-a vao oa tuariri rutu Aite tapo touva, oa iava poeravira ora karekeera uva va kekeiovora igei. ³Uva igei va kekeiovora ora va uvuiovora. Oa-a eva oa iava visii siposipopaiovoi, oisore ra va iava vigei rutu uvuipaviei ra katai vovou raga purape Aite tapo ora rera Oviitoaaro Jisas Krai. ⁴^b Uva vo reoa vao-ia oa rigatopaiovoi, oisore ra va-ia vigei rutu vukupavio rutu vao-ia rorua.

Uvuipaviei Ra Aviavia-ia Vokape

⁵^c Vo reo-a vao-ia oa uvuiovora oreoa igeipa vaterevora ro Pauto Oviitoaaro. Oa iava visiipa siposipopaiovoi oiso-ia, Pauto-a aviavia ira-ia viapau rutu rupaa vai toupaveira. ⁶Vosa vigei oiso puravio, “Ragai katai vovou rutu purapaavoi rera tapo,” vo osa rupa vovou vo pitupituaro-ia vokapape, oire ra oisi iava vo reo oiso pura piro, Kuuvu reo. Ra viapau oiraopa reo vo pitupituaro-ia vokapape. ⁷Ari vosa rera vo aviaviaro-ia vokapape vo aviavio oa-ia toupaveira Pauto, eva oa iava vigei rutu katai vovou purapape oearovu rutu tapo araoko irara oavi, voeao oirao pie vovou irara. Oire ra va iava revasiva o Jisas iava Pauto Oviitoaaro vigei iava vuriara oavi verapaeve. Ra va iava sisigaruepavio.

⁸^d Vosa oiso puravio, “Ragai viapau vuria vaiei,” oire uva vigei raga ora vigei iava sopaaro oavi kekeapai. Ra oisi iava viapau oiso Pauto vaaro oiraopa reo vigei sopaaro-ia toupave. ⁹Ari vosa vigei vuri vovou oavi kosi piepe vara iava Pautoa-pa tavitavio, eisi osare reo ovoi purareva oiso ra oisi iava oiraopavira oisi pierave vigei-ia. Osa iava uvuiparoi ra vigei iava vuriara oavi verapareve vigei-ia rera vaaro torevoko vovou rutu purapaaro. Eisi osa iava uvuipaviei ra sisigaruevira rutu toupape. ¹⁰^e Vosa oiso puravio, “Viapau oiso ragai vuria vai oiraopavira puraavorao,” uva vo reo-a eva oa-ia Pauto oiso pie ragapai, Kuuvuto, uvare oiso puraroepa, “Oirara rutu vuri vovou purapaveira.” Ra oisi iava viapau oiso rera vo reoaro oiraopa reo vigei sopaaro-ia toupave.

Krais-a Vigei Tauvapatu

2 ¹^f Vo rigato puraavoi visiipa kakae vure oaa, auere ra viapau vuri vovou purapata. Oire vosa irai vuria vai purapareve, uva toupave Jisas Krai vigei tauvapatuaro eera torevoko vovoutoa rutu, ira Aite arepareveira vigei iavirava. ²Aue vituaro iava uvare Krai raga-a ira raiva purareva vigei vo vuri vovou oavi vo voriaro opesi pieoro vaore,

^b 1:4 1 Jo 2:1; Jo 3:29, 15:9-14 ^c 1:5 Jo 9:1-7, 39-41 ^d 1:8 Jop 15:14; Pro 20:9; Je 3:2
^e 1:10 1 Jo 5:10; Ro 3:21-25 ^f 2:1 Ro 8:31-39; Jo 14:15-26; Hi 7:25

oiso ra vuriara rutu vera ovoireve vigei iava. Ari ita, uva viapau oiso vigei raga varaaro-a vuriara. Ari oearovu rutu vo vovouroaro-a vuri vovouro voearo voraro rutu.

³Vosa oiraopavira rutu Pauto vo rearo goru reo rutu sirova vearovira rutu utupavio, oire ra va iava oiso taraipavio, O ari, oiraopavira rutu Pautoa-ia taraipaviei. ⁴Ari vosa irai oiratoa vai oiso puraro, “Ira-ia Pauto taraiparai,” vo osa viapau vearovira rutu Pauto vaaro goru reo sirova viapau utuparo, oire uva rera-a eera riro kuuvuto. Ra viapau oiraopa reo sirova utuparo va-ia taraipasa. ⁵Ari ro ira Pauto vo rearo uvupaoro va purapareve, eera-a ira vuku iraoparoveira rerapa siraopaoro. Oire uva apeisi ragavira uvuipaviei ra vao-ia taraipavio oiso, Ora tavosiviei rutu Pautoa tapo, eke? ⁶^s Eisi osa-a oiso-ia vosa irai oiso puraro, “Ragai Pautoa tapo tavosivira toupaaivoi,” uva rera-a eera torevoko pitupitu puraparevoi oiso rutu osa Jisas Kraiss oisoa va purapaoro toupareve vo rasio-ia.

**Ro Oirato Ira Araokotoapa Ora Rera Iava Sopau
Rutu Vatepareve, Eera Ira Aviavia-ia Toupere**

⁷^h Vate irara oaa, riro goru reo rutu vao-ia oa rigatoavoivi visiipa. Uva viapau oiso airepa reoa. Viapau. Ari tuariripa reo rutu-a vao-ia vo reo oa oisoa visii-ia toupave vo osa oirao pie vovouro oavisii rovoera. Oreoa raga vao-ia oreoa vo siposipoaro-a vao oa uvutava voari tuariri rutu. ⁸ⁱ Uva vo reo raga-a vao-ia goru reo oare oiso puraparai, Airepa reo. Eake iava? Uvare tutuu pievoi auere ra rupa vuuta opesipe. Uvare oiraopa aviavi rutu voare kaviko vovou vo pitupituaroro roroparevoi aviavipaoro. Vao vituaro osa ragavira oirara uvuipaai ra goru reo eveipaive oiso puraoro, “Akoera, oiraopa reo rutu-a vao,” vo aue iavirava Kraiss vo touaro ora visii vo touaro tapo.

⁹Ari ita, vosa irai ita oiso puraro, “Ragai aviavia-ia vokapaavoivi,” vo osa kasipuparo ora rera araokotoaarore, ira-a eera ira tovira rutu rupa-ia toupareveira vo rutu vo vuutao rutu-ia rekasisa vo vokio. ¹⁰Ari ro ira araokotoapa siraoparo, ira-a eera ira aviavia-ia vokapareveira. Eisi osa iava viapau oiso vuria vai rera-ia toupaveira vao oa iava viapau uvuiparoi ra irai vovouaro piro piereve. ¹¹^j Ari ro ira araokotoare kasipuparo, ira-a eera tovira rutu rupa-ia touparevoi. Orupaa-a eva oa sovara-ia viri ragapareveira torevoko rugoo arova. Eake iava? Uvare rera osireiara voosi pieva vuri rugoo.

¹²Kakae vure oaa, vo rigato puraavoivi visiipa, uvare vuri vovouro oavisii rutu vera ovoireva Kraiss visii iava rera vo raivaaro iavirava.

^s 2:6 Jo 15:10-14; 1 Pi 2:21 ^h 2:7 1 Jo 3:2, 11 ⁱ 2:8 Ef 5:8; 1 Te 5:5; Jo 1:9
^j 2:11 Jo 12:35

¹³ Aite irara, vo rigato puraavoi visiipa, uvare rera-ia taraipatai ro ira oiso toupaveira voari rutu rovoa-ia ora vo vokio. Uva visii tapopa viovoko irara vo rigato puraavoi. Vao vituaro iava uvare ro-ia putetavorao rutu tugara kare reitoaaro ro-ia Seten rera vo varivariaro tokooro.

¹⁴^k Oire ragai-a vao vo rigato puraavoi visiipa kakae vure oaa, uvare taraipatai ro-ia vigei Aitearo. Uva vo rigato puraavoi visiipa aite irara, uvare taraipatai rera-ia ro ira voari rutu oisoa toupaveve rovoa rutu-ia ora vo vokio. Ora visii vao viovoko irara visiigoapa tapo vo rigato vao-ia puraavoi, uvare goru vovouvira rutu toupataveira, vo osa Pauto vo rearo kovopaiveira visii iava sopaura sovara-ia. Ora vao tapo iava osa rera-ia ro Seten-ia putetavora rutu rera vo varivariaro tokooro.

Viapau Uvui Iraopaviei Ra Ora Vigei Iava Sopaura Oavi Vatepape Rasito Vo Pitupituaropa

¹⁵^l Opeita varao riiriipata oara rasitoo-ia toupaveira, ora varao oara rasitoo iava ora karekepapeira. Vosa oisi eisi piepata vara ragare rugorugoopaoro rasitoo iava vara, uva viapau uvuipai ra visii-ia toupave vao Aite tapo ora tavosipa vovou. ¹⁶ Eake iava? Uvare varao oara vova rasitoo-ia ora karekepapeira oiso-ia osa varao oarapa ruipa iraopaaveira oirara vuri vovouro rutu purapaoro. Ora oiso osa vara kekepaoro vara riiriipaiveira. Ora oiso osa vara iavirava oirara ora voea-ia rei vaisi purapaiveira. Ari ita, viapau oiso varao iava oisi oai kareke piepareveira Aite. Ari rasitoo raga aueroaro-a evara. ¹⁷^m Oire uva rera ro-ia rasito ora vara rutu varao oara riiriipaiveira ovatakoroa rutu opesiperea. Ari ro ira Pauto vo vovouaro sirova vearovira rutu utuparo, eera-a ira Opsi Asa Tootoo rutuva toupavevea.

Keripa Irara Kraisa-va Karea Viroi

¹⁸ⁿ Kakae vure oaa, vigei-a vao ovoioapa vuuta-ia toupai. Oire uva vo vuuta eveipai rutu vao-ia. Eake iava? Uvare riro irara rutu-a Kraisa-va ora keripa irara oea karekarekepa viroi. Ari ita, tuariri voea iava uvu rovtava oiso, "Ro Kraisa-va ora keripato ira tapo epao vo vuuta-ia eva uriosa aue-ia ovoioapa vuuta. ¹⁹ Oire uva voea-a evoea keripa irara oea viapau oiso vigei tapo ora tavosiaepa. Eisi osa vituaro iava vigei kavuiva. Vosa oiraopavira rutu vigei tapo ora tavosipaave, osa iava uvuipaai ra touvira rutu vigei tapo toupave. Ari vigei arova avaaepa. Oa iava uvuipaviei ra vearovira rutu taraipavio oiso, Asi viapau oiso voeao vigei tapo ora tavosiaepa.

^k 2:14 1 Jo 1:1; Ef 6:10; Jo 5:38 ^l 2:15 Ro 12:1-2; Mt 6:24; Je 4:4 ^m 2:17 1 Ko 7:31

ⁿ 2:18 1 Pi 4:7-8; 1 Jo 4:1, 3

20^o Ari ro raga Tugoropato Uraurato ira visii-ia toupaveira, Krai ira vara piereva visiipa, eera ira iava oiraopa reo rutu-ia vearovira taraipataveira. 21 Oire uva vo rigato puraavoi visiipa, aue iava uvare oiraopa reo rutu-ia taraipataveira. Ari ita, viapau vao-ia oiraopa reo rutu tarai asavira toupataveira. Ora vao-ia tapo oiso taraipataveira, Viapau oiso vao kuuvu reo vova oiraopa reo rutu-ia karekepapeira.

22^p Oire uva iroutoa rutu-a rera ro riro kuuvuto? Ari ro raga ira oiso puraproveira, “Viapau oiso Jisas-a ro Krai ro ira arureva Pauto vo rasio iare. Uva rera raga-a eera Krai-va keripato. Ira vo aaorei rutu ora Aiteto ora Oviito akaipa piepareveira vo aaoreire isivapaoro. 23 Uvare ro oirato ira oiso Oviitoare isivaparo, eera ira Aitetoare tapo isivaparo. Ari vosa irouto ro ira Oviito vaisipaoro oearovupa tavitaviparo oiso, “Jisas-a Pauto Oviitoaro,” eera ira-ia toupaveira Aite.

Tugoropato Uraurato Ira Vigei Tarai Piepareveira Oiraopa Reo Rutu-ia

24 Ora vatatopo iraopata, ra vo siposipo oriru iraopata oa uvutava voari rovoa-ia. Ra goruvira rutu vo siposipo-ia pitupata. Ra va-ia toupaooro uvuipatai ra Oviito tapo ora tavosivira rutu toupata ora Pauto Aite. 25^q Krai reo ovo i rutu vatereva, oisore ra va iavirava Tootoo Ovo i rutu oupape rera ruvara-ia.

26 Ari ita, vo rigato puraavoi visiipa voeao iava oea oiso ruipapaaveira rutu ra visii-ia kokarapaave voea vo reoroaro-ia kuuvuara. 27^r Uva viapau oiso torevokopapeira voearopa oearovu, oiso ra visii tarai piepaive vo reo iava oiraopa reo o vo reo iava kuuvu reo. Eake iava? Uvare Tugoropato Uraurato visii-ia toupaveira ro ira vara piereva Krai visiipa. Rera-a Tugoropato Uraurato ira visii tarai piepareveira orekerovu rutu iava, uvare rera vo siposipoaro-a oiraopa rutu. Viapau oiso keakeapavira oirara tarai piepareveira. Oa iava uvui iraopatai ra rera vaaro oiraopa reo rutu sirova utupata vo osa Krai tapo tavosivira toupata.

28 Ari ita, kakae vure oaa Krai tapo tou iraopata vo vokie iare oa-ia oiso vorevira karekeroverea ita. Uva eisi tuuvu vovouvira toupaooro viapau oiso ra ora vataupavio rerapa ariipaoro vo vokie-ia oa-ia vorevira ora karekeroverea vigei iare. 29^s Oire uva oiso ragavira taraipata, Krai torevoko vovouvira rutu toupaveira oa-ia viapau vuria vai. Oisi eisi ragavira rera-ia taraipaoro uvuipatai ra vao-ia tapo vearovira taraipata ro iava oirato ira torevoko vovou purapareve, ira raga ita-a eera Pauto oviitoaro.

^o 2:20 1 Ko 2:9-16; 2 Ko 1:21 ^p 2:22 Re 21:8 ^q 2:25 Jo 3:16-21, 17:3 ^r 2:27 Jo 16:7-13
^s 2:29 1 Jo 3:7, 9, 4:7

Oiso Toupapeira, Vigei Pauto Ovii Iraraaro

3 ¹ Oiraopavira rutu Aiteto-a ira vigei kaviko iraopareveira rutu. Uva pute pie sirao rutu-a rera vaaro oa-ia vigeipa toupaveira. Oa-a vao vituaro iava vo vaisio vigei-ia toupaveira oiso, Vigei-a Pauto ovii iraraaro. Uva ita, oiraopavira rutu uvare oisi ragavira toupapeira. Eva-a oa vituaro iava voea voeao vo rasio-ia viapau oiso vigei-ia taraipaaveira vo osa oisi eisi toupape. Uvare viapau oiso Pautoa-ia taraipaaveira. ² Kakae vure oaa, oiraopavira rutu osa oiso toupapeira, Vigei vao-ia Pauto ovii iraraaro. Uva tou visivi roroio pievira rutu ora vigei vo touaro-ia taraipavioverea, otoua pura piroverea vovio Pauto vo uruiaro-ia utupa visivi. Ari vo vokio oiso taraipaviei, Oiraopavira Krai vore vorevira karekeroverea vigei iare. Oa iava rera kekeperea oiso osa oiraopavira rutu toupaveireea. Vo osa rera-ia oiso tarairo oisi rutu karekevioverea osa rera. ³ Eva-a oa iava voeao oea Krai-ia raripaaro toupaveira tuevira vo vuutaore oa-ia vaeavira toupaveira oiso osa rera, vo rara ora voea iava sopaura oaive tokipaive oiso ra roroiavira toupave. Osa iava viapau vuria vai voea-ia, oiso rutu osa Krai ro ira-ia viapau vuria vai.

⁴ Ari ro oirato ira vuri vovou purapave, eera-a ira Pauto vaaro reo goru gasipaveira. Eva vituaro-a vao-ia uvare va eva vuri vovou oa sirova reo goru gasipaveira. ⁵ Oire uva taraipata oiso, Krai oiravira karekeroera vo rasitoo-ia, oisore ra raiva purave oirara rutu varaaro vuri vovou verapa raiva. Ora aue tapo taraipata oiso, Viapau rutu vuri vovou oisoa purapave Krai vo osa oisoa vo rasitoo-ia toupave. ⁶ Oire uva voeao oea oiso Krai-va ora tavosipaaveira, oea viapau oiso vorevoreripavira vuri vovou purapaveira. Ari ro ira vuri vovou purapave vorevoreripavira, eera-a ira viapau oiso Krai vo touaro vituaro eveirevora. Ora viapau oiso Krai-ia tarairoera.

⁷ Kakae vure oaa, viapau rutu oiso ra iravupa ora visii iava vasepata, ro ira uvuiparoi oiso ra visii keakeapave. Vao vituaro iava oiso-ia vo osa ro ira torevoko vovou rutu purapave, ira-a eera ira-ia torevoko vovou rutu toupaveira oiso rutu osa Krai vo vovouaro. ⁸ Ari ro ira vorevoreripavira vuri vovou purapave, ira-a eera Seten reraaro. Uvare Seten vo pitupituaro sirova utuparoveira. Evo vovou vuria rutu Seten oa oisoa purapave voari rutu rovoa iava, vo osa vo rasio pura asavira touva. Oire uva Pauto Oviitoaaro karekeroepa va vao Seten vo kovoaro opesi piesa. ⁹ Ari ro oirato Pauto reraaro ira viapau oiso vorevoreripavira vuri vovou vai purapave. Eake iava? Uvare Pauto-a Tootoo rutu vituaro. Ovituaroo-a vao rera vaaro oa rera sopaaro-ia

¹ 3:1 Ef 2:1-7; Jo 1:12 ² 3:2 1 Ko 13:9-13; Ro 8:15; 2 Ko 4:17 ³ 3:7 1 Jo 2:1, 26, 29; Hi 6:1-9

oirato toupaveira. Ari ita, Pauto-a eera oirato aitetoaaro. Oa iava viapau uvuiparoi oirato ra vorevoreripavira vuri vovouro vai purapareve.

¹⁰Oire ra oiso ragavira taraipavio, Pauto ovii iraraaro pisa visivi rutu toupaveira voeaopa Seten ovii iraraaro. Vao vituaro iava vosa ro ira viapau torevoko pitupitu purapareve, ora viapau oiso ora rera sopaaro vatepare araokotoapa siraopaoro, ira-a eera ira oiso toupave, Viapau oiso rera-a Pauto oviitoaaro.

Oiraopa Vovou Rutu Sopaua Rutu Vatepasa Araokotoa Oaviipa

¹¹Vo tavitavia-a vao-ia oa iava uvutava voari rovoa-ia oa oiso purapai, Vigei uvui iraopaviei ra oearovivupa siraopavio ora vigei iava voea. ¹²^w Uva viapau rutu oiso uvuipaviei ra oiso piepape osa ro-ia Adam oviitoaaro Ken Seten reraaro. Ira araokoto uporeva rera kopii pieoro. Oire uva eake-a vao oare araokoto upooro rera kopii piereva? Oa-a vao vituaro oiso toupavoi-ia, uvare rera oisoa vuri pitupituro purapareve, ovusa eera araokoto torevoko pitupituro oisoa purapareve.

¹³^x Araoko irara oaa, opeita oearovu vo vovouroaro-ia tavetave iraopata voearo vo rasio-ia vo rara visiire kasipu iraopaave. ¹⁴Ari vigei-a vao vigoa ora vigei araoko iraraaropa sirao iraopavioveira. Eva-a oa iava uvuipaviei ra taraipavio oiso, Va vao kopiipa vovou oa iava iviropavieraoro vore tootoopa vovou-ia. Uva ro oirato ira viapau siraopa vovou purapareve, eera-a ira touvira toupavevoi kopii vovou raga-ia. ¹⁵^y Ro ira touvira kasipu vovou purapareve ora rera araokotoaarore, ira ita oiso toupavevoi osa riro oira upoto. Oa iava rera-ia taraipatai oiso, Viapau oiso ro-ia Tootoo Ovoi vai toupaveira. ¹⁶^z Oire uva apeisi ragavira uvuipaviei ra vearovira rutu va-ia vao sirao vovou taraipavio? Ari oiso-ia, Krais ora rera iava vasereva oearovupa, oiso ra rera kopii pieve vigei iavirava. Oa iava uvui iraopaviei ra ora vigei iava tootooara oavi rutu vatepape oearovivu araoko irara oavi tauvapaoro. ¹⁷^a Vosa irouto ro ira riroara rutu-ia orekerovu rutu pitupareve, ra varava reasiparo iravivu araokotoaaro tauvapa arapa, vosa eisi piepareve, ra eake iava oiso puraparo, “Ragai Pautoa-pa siraoparai rutu ora ragai sopaaro rutu iava”? Viapau oiso uvuiparoi rutu ra oisi pierve. ¹⁸Kakae vure oaa, vigei viapau rutu uvuipaviei ra sirao reo purapape vo ragava gisipoara iava. Viapau. Ari vosa sirao vovou rutu purapape, oa iava uvuipaai oearovu va eveipasa, vo rara sirao vovou rutuva kovopaoro oearovivu tauvape.

^w 3:12 Jen 4:1-15 ^x 3:13 Jo 15:18-27 ^y 3:15 Mt 5:21-26 ^z 3:16 Ro 16:1-4

^a 3:17 Je 1:22-27

Ro Riro Rarito Viapau Uvuipa Ra Uririparo Pautoa-pa

^{19b} Uva oisi eisi oearovupa siraopaoro uvuipaviei ra oiso taraipavio ora vigei-ia, Oiraopa vovou purapai va vao Pauto vo vovouaro rutu. Osa iava uvuipaviei ra Pauto osireiario-ia rasivauru vovouvira rutu toupape. ^{20c} Vao rutu vituaro iava vosa ora vigei iava sopaura oavi rutu-ia sovopape oiso, O ari vuri pitupitu purapai. Oire uva uvuipaviei ra oiso ragavira taraipavio, Pauto vo taraiaro vigei vo vovouroaro-ia putepaiveira rutu. Uvare orekerovu rutu-ia taraiparoveira rera Pauto. Eva oa-ia uvuipaviei ra Pauto osireiario-ia uriri asavira toupape. ^{21d} Oire vate irara oaa, vosa ora vigei iava sopaura oavi sovopaoro oiso purapavio, Asi vigei viapau oiso vuria vai purai, eisi osa iava uvuipaviei ra Pauto osireiario-ia uriri asavira rutu toupe. ^{22e} Uva varao oupapeira rera ruvara-ia oarare rera arepapeira. Eake iava? Uvare rera vaaro goru reo uvupapeira oisi va purapasa. Uva va-a eva oa-ia rera roru piepapeira ora vigei-ia. ²³ Uva va-a vao oare vigei tavitavipareveira rera vo reoaro-ia gorua oiso-ia, Rera vaisiario oirao piepape rutu rera Oviitoaaro Jisas Krais. Ra oevavupa va iava siraopavio voeao vigei iava voea oiso osa Pauto goruvira rutu vigei tavireva. ^{24f} Oire ro ira Pauto vo reoaro sirova utuparo va purapaoro, Pautoa-va ora tavosiroi, vo osa Pauto rerava ita ora tavosiroi vo rera sopaaro-ia. Uva apeisi ragavira uvuipaviei ra Pautoa-ia taraipavio vo osa toupaveve vo vigei iava sopaura-ia? Ari ro raga iavirava ita ro-ia Tugoropato Uraurato Pauto ira vatereva vigeipa.

Pauto Reraaro Uraurato Ora Vurito Iravu Uraurato

4 ^{1g} Avoeao vate irara oaa, opeita oevu oirara vo reoroaro oirao pie ragapata voeao oea oiso purapaaveira, “Ragai-ia Tugoropato Uraurato touparevoi.” Viapau. Ari uvuipatai ra voea kerisi iraopata rerare ro uraurato vo osa voea rovirieipata oiso, Ro Pauto reraaro, ari vo urauraaro vo rasio iava. Aue vituaro iava uvare riro irara rutu profet irara voeao reo topa piepa irara oea vokapaiveira voraro rutu. Oea kuuvuvira Pauto vo kovoaro purapaiveira. ^{2h} Uva uvuipatai ra vearovira Pauto reraaro evei iraopata, uvare Pauto reraaro Uraurato ro-ia toupaveveira ira oirara oiso tavitavipareveira, “Jisas Krais oiravira urioroepa vo rasio iare.” ³ Ari ro ira oiso puraparoveira, “Viapau oiso Jisas Krais-a Pauto Oviitoaaro,” eera-a ira-ia viapau toupaveveira Pauto reraaro Uraurato. Viapau. Ari iravu raga-a uraurato ira Krais-va ora keriparoveira. Ari ita, rera iava uvu rovatava ira iava oiso puraaepa, “Urioroverea.” Uva rera epao ira touparevoi vo rasio-ia.

^b 3:19 1 Jo 2:21 ^c 3:20 1 Ko 4:4 ^d 3:21 1 Jo 5:14 ^e 3:22 Mt 7:7, 21:22; 1 Jo 2:3
^f 3:24 Ro 8:9 ^g 4:1 2 Ko 11:13-15 ^h 4:2 Ro 10:8-13

⁴ⁱ Oire uva visii-a vao ovii irara oaa Pauto voeaaro visiigoa voeao-ia kuuvu irara profeta irara putetavora, voeao oea visii varaaro oirao pie vovouro oavisii piro pie ragapaivora, osa viapau uvuipaaera. Eake iava? Uvare Tugoropato Uraurato vo varivariaro visii sopaaro-ia toupaveira, ro ira vurito vo varivariaro-ia putepaveira rutu. Ro vurito ira voeopa reipaveira vo rasio-ia. ⁵ Voea kuuvu irara profet irara oea vo reoro kosi piepaveira varao iava orekerovu rasito aueroaro. Oa iava oearovu voearo vo rasio iava oearoa voea vo reoroaro uvupaaro oisi vara purapaveira, uvare voeao tapo ita profet irara vo rasio-ia tou irara. ⁶^j Ari vigei-a Pauto voeaaro. Uva ro ira Pautoa-ia taraipaveira, ira ita vigei vo reoroaro uvupaveira. Ari ro ira viapau Pautoa-ia taraiparo, eera-a ira vigei vo reoroaropa reasipaveira. Eva-a oa iava uvuipaviei rutu ra urauratoarei vearovira rovirieipape oisi va iava vaiterei eveipaaro oiso, Irvu-a ro oiraopa rutu vituaro. Ari ro-a ro ira oirara piro piepareveira voea keakeapaaro.

Pauto-a Vereopa Vovou Rutu Vituaro

⁷ Vate irara oaa, uvui iraopaviei ra ora vigei iava oearovivupa siraopavio, uvare vereopa vovou rutu vituaro-a vao-ia ro-ia Pauto. Uva aa ro-a ro-ia oearovu kavikopaveira? Eera oirato Pauto reraaro ira Pautoa-ia taraipaveira rutu. ⁸ Ari ro ira viapau kaviko vovou purapave, eera ira viapau oiso Pautoa-ia taraiparoi. Eake iava? Uvare Pauto-a kaviko vovou rutu vituaro. ⁹^k Uva Pauto ora rera vaaro kaviko vovou karekereva, vo uvare ora rera Oviitoaaro Kataito arureva vo rasio iare. Oa iava uvuipaviei ra oiraopa tootoo rutu Tootoo Ovoi oupape vao iava Oviito vo kovoaro. ¹⁰ Oire uva eake rutu-a vao kaviko vovou rutu vituaro? E oiso toupavioi pasi ra Pautoa-pa sirao rovpavio, eke? Viapau. Easi vao-ia uvare Pauto vigeipa sirao rovroepa rutu. Oa iava Oviito arureva vo rasio iare raiva purasa, oraiva-ia vigei vo vuri vovouro oavi vo voriaro opesi piereva.

¹¹ Vate irara oaa, vosa Pauto oiraopavira rutu eisi vigeipa siraoroepa, uva vigei ita uvui iraopaviei ra oisi oearovivupa sirao iraopavio. ¹²^l Ari ita, viapau oiso iraieti ro ira Pauto kekereva. Ari vosa oiraopavira rutu ora vigei iava oearovivupa siraopavio, eisi osa iava uvuiparoi Pauto ra vo toupave vigei iava sopaura-ia. Eva-a oa iava uvuipai ra rera vo kavikoaro kovopaive riropaaro vo vigei iava sopaura-ia.

¹³ Uva uvuipaviei ra oiso taraipavio, O ari, Pautoa tapo tavosivira toupapeira. Ora aue-ia tapo osa vigei tavosivira toupaveira, uvare vigeipa Tugoropato Uraurato vatereva. ¹⁴ Ora oiso tapo osa va vao

ⁱ 4:4 Ro 8:31-39; 1 Jo 5:4 ^j 4:6 1 Ko 2:9-16; Jo 8:47; 1 Ti 4:1 ^k 4:9 Jo 3:16; 1 Jo 5:11; Ais 9:6-7 ^l 4:12 Jo 1:18; 1 Ti 6:16

kekeerao ora vigei varaaro iava osireiara. Oa iava uvuipaviei ra oearovivu oiraopavira tavitavipape oiso-ia, Aiteto Oviito arureva, auere ra oiso rasitua-ia tou irara vorevira oureve ora rerapa voea varaaro tootooara oaive orirusa. ¹⁵Ari ro ira oirara tavitavipareveira oiso, “Jisas-a Pauto Oviitoaaro,” eera-a ira sopaaro-ia Pauto toupaveira, ovusa rera ita Pautoa-va tautosivira toupaveira. ¹⁶Uva vigei tapo ita vo vovou-ia taraipavioveira oa purareva Pauto vigeipa. Ora rera vaaro kaviko vovou oa oirao piepapeira tapo.

Iu, Pauto-a kaviko vovou vituaro. Vosa irouto ro ira vo vovou vituaro sovara-ia toupaveira vo vovou purapaoro, eera-a ira Pauto tapo tautosivira toupaveira, ovusa ita Pauto rerava ora tautosiparo. ¹⁷Oire uva eake-a vao oare vo kaviko vovou eva kovopaoro riropapeira sopaura oavi-ia? Auere ra va iava tuuvu vovouvira rutu toupape vo vokio-ia oa-ia Pauto oirara rutu rovirieireverea. Rara vearovira rutu ora vigei-ia taraipavio oiso, Akoea, ari vigei vo touaro vo rasio-ia oiso rutu toupai osa Krai ro touaro toupaveira. ¹⁸Vosa kaviko vovou toupave vo vigei iava sopaura-ia, oa iava viapau uvuipai ra uriri vovou otavukiaro toupave vo ora vigei iava sopaura-ia. Viapau. Aue vituaro iava uvare kaviko vovou rutu-a vao oa uririara rutu kosi piepaveira. Oire vosa uriri vovou vai toupave vo irai iava sopaua vai-ia, ra va iava taraipaave oiso, Asi ro vurua vo voriarore rugorugopaoro. Oire va-a eva uriri vovou oa vituaro iava kaviko vovou viapau uvuipai oiso ra rirope rutu rera-ia.

¹⁹^m Siraopavio. Eake iava? Uvare Pauto vigeipa sirao rovropea. ²⁰Oire vosa irai oiratoa vai oiso puraro, “Ragai Pautoa-pa siraoparai,” vo osa araokotoaarore kasipua rera-ia toupave, oire uva rera-a eera riro kuuvutoa rutu. Oa vituaro iava oiso toupai, Vosa viapau araokotoaaropa sirao rovoparo, ro ira uvuiparoi rera kekepareve, oire uva apeisi ragavira oiso osa iava uvuipa ra Pautoa-pa siraoparo, ro ira viapau uvuiparo ra Pauto kekepareve? ²¹Riro goru reo rutu vatereva Pauto vigeipa oiso-ia, “Ro ira Pautoa-pa siraoparo, eera-a ira uvui iraoparoi ora rera araokotoaaropa tapo sirao iraoparo.”

Riro Oirao Pie Vovouto Ira Rasito Vo Pitupituaro-ia Putepaveira

5 ¹ⁿ Vosa irouto oiso oirao piepareve, Pauto Jisas roporevoiva, rera-ia vo vaisio tovoreva, Krai vigei tuvetuvepatoaaro, ira ita-a eera oirato Pauto oviitoaaro. Uva ro ira Aitepa siraoparo, ira ita ovii irarapa tapo siraoparoveira. ²^o Eisi osa iava uvuipaviei ra taraipavio oiso, Vigei-a vao Pauto ovii iraraaropa siraopavioveira, uvare Pauto Aite irapa siraopavioveira. Ora rera vo reoaro tapo sirova utupavioveira vao goru reo rutu. ³Vosa vo reo riro goru reo sirova utupavio vo reo orirupaoro

^m 4:19 2 Ko 5:14-17 ⁿ 5:1 1 Ko 15:1-11; Jo 1:12 ^o 5:2 1 Jo 2:5

vo vigei varaaro-ia sopaura oavi-ia, ra oiso toupape, Vigeo ita Pautoa-pa siraopavioveira. Ora vao rera vaaro riro goru reo rutu vao oa viapau oiso vavagisipapeira vigeipa vo osa va purapape. ⁴*p* Aue iava uvare voeao oea oiso toupaveira Pauto voeaaoro rera vo reoro purapaoro, oea uvuipaaveira rutu oiso ra rasito vo pitupituaro vo goruaro-ia putepaveira. Uva vo goruo-ia putepa vituaro oiso toupai, Eva vigei vaaro oirao pie vovou rutu. ⁵Ari ita, irouto-a ro ira uvuiparoi vo goru-ia vao rasito vaaro putepareve? Ari ro raga ira oiso puraparoveira oirao piepaoro, “Jisas-a Pauto Oviitoaaro.”

Pauto Roroiovira Taviroepa Oviitoa Iava

⁶*q* Jisas Krai ira raga vo rasio iare urioroepa. Oa iava baptaisa oureva uuko ovi-ia. Ora oiso osa ora rera iava revasiva vatereva evao parikou-ia kopiioro. Ari ita, uva viapau oiso vao ragava urioroepa baptaisa vo pitupituaro aue-ia uuko. Viapau. Ari varei rutu-a oiso-ia, uuko vao-ia ari revasiva o. Oarea rutu oirao piepareveira Tugoropato Uraurato, uvare rera raga oiraopatoa rutu. ⁷Oire uva vo peva rutu-a varao-ia oara oiraopavira rutu tavitavipapeira Krai iava oiso-ia, ⁸*r* Tugoropato Uraurato-a ro-ia, ari uuko-a vao-ia, ari revasiva-a o-ia. Opevaa rutu kataivira rera iava oiraopa reo rutu kosi piepaveira. ⁹*s* Oire uvuipaviei ra vo reoro oirao piepape oara oiraopavira purapaveira oearovu oirara orekerovu iava. Oiso osa Pauto va vao oirao pie reo purapaveira Oviitoa iava. Oreoa-a eva oiraopa reo oa oirara vo reoroaro-ia oiraopa reoro putepaveira rutu. ¹⁰Uva ro ira Pauto Oviitoaaro oirao piepareveira, eera-a ira sopaaro-ia Pauto vo reoro oiraopa reo rutu toupaveira. Ari ro ira viapau Pauto vo reoro oirao piepareve, eera-a ita ira Pauto oiso piepare, Riro kuuvuto. Eake iava? Uvare viapau oiso vao oiraopa reo oirao piepareveira rutu vo reo oa purareva Pauto ora rera Oviitoaaro iava tavitavipaoro. ¹¹Oreoa vao oiso purapai, “Pauto vigei vatereva Tootoo Ovoi vo tootoo-ia oa-ia vituparoveira rera raga Oviito.” ¹²*t* Ari ita, ro ira Oviitoava ora tavosivira rutu toupaveira, eera ita ira-ia Oiraopa Tootoo rutu toupaveira. Ari vosa irouto-a ro ira viapau Oviitoava ora tavosivira toupaveira, uva rera-ia viapau oiso Oiraopa Tootoo toupaveira.

Vigei Uvuipaviei Ra Taraipavio Oiso, Vigei Tootoo Ovoiva Toupai

¹³*u* Vo rigato puraavoi visiipa oisore ra vearovira rutu taraipata oiso, Tootoo Ovoiva toupatavoi visii vao-ia visiigoa vo Pauto Oviitoaaro vaisiario oirao piepataveira. ¹⁴*v* Oire uva uvuipaviei ra tuuvu vovouvira

^p 5:4 Hi 11:1-6; Jo 16:33 ^q 5:6 Mt 3:13-17; Jo 19:34 ^r 5:8 Jo 19:31-37; Mt 18:16

^s 5:9 Jo 8:17-18; Mt 3:16-17 ^t 5:12 Jo 3:36 ^u 5:13 Jo 20:30-31 ^v 5:14 1 Jo 3:21-22; Mt 7:7

toupape vo Pauto osireiario-ia, uvare taraipaviei oiso, Vigei varaaro variriara uvupareveira, vo osa rera arepapeira rera raga vo ruipaaro sirova utupaoro. ¹⁵Ari ita, vigei vo reoroaro uvupareveira, vo osa variripavioveira rera akepaoro. Oa-ia oiraopavira rutu taraipavio. Oire uva va-a eva oa vituaro iava uvuipaviei ra oiso ragavira taraipavio, Varao epao oara vateparevere vigei vo ruipaaro uvui ovoipaoro.

¹⁶ Oire vosa irai ro ira araokotoaarova siitueparo, ovusa vuria vai purapareve ro oirao pie vovouto, ovuriava eva viapau oiso opesiroverea Tootoo Ovoi ou asavira, uva uvuiparoi ra Pauto arevere rerapa araokoto. Oa iava uvuiparoi ra tootooa vatereva araokotoaaropa rera vo rugoaro torevokopaoro. Uva voeaore reoreoparai oea oiso varao vuriara purapaive oarava viapau oiso opesiaverea Tootoo Ovoi ou asavira. Ari oavuei touvira vuria, ovuria vo vovouaro sirova utupaoro uvuipaai oirao pie vovou irara ra vo vovou iava opesiave Tootoo Ovoi ou asavira. Uva viapau oiso visii tavitavipaavoi oiso ra rerapa Pauto aketa eera ira eisi vo vuri eva purarevora. Viapau. ¹⁷Oaravu rutu vuri pitupituro oara purapaoro vuri vovou purapapeira. Ari oaravuei varao oara viapau oiso visii oiso piepaiveira ra vara iava opesipata Tootoo Ovoi ou asavira.

¹⁸Vigei taraipaviei rera-ia oirato Pauto reraaro ira viapau vorevoreripavira vuriara purapareveira, uvare Pauto Oviitoaaro Jisas rera utopareveira. Eva-a oa vituaro iava viapau uvuiparoi Vuritoa rutu Seten oiso ra rera vuri piereve eera oirato.

¹⁹Oire uva uvuipaviei ra ora vigei-ia taraipavio oiso, Vigei-a vao-ia Pauto voeaaro, vo ovusa riro irara rutu voea oearovu oea toupai vo rasio-ia, oeapa reiparoveira ro-ia Seten.

²⁰Uva Pauto Oviitoaaro-ia taraipavio oiso-ia, Ira urioroepa vigei vo rugorugooroaro aviavi piesa, oisore ra va iava aviavi pievira rutu taraipavio Oiraopatoa-ia Pauto. Uvare vigei varaaro tootooara toupaveira rera raga-ia Oiraopatoa rutu Pauto ro raga ita Oviito Jisas Krai. Eera raga Oiraopatoa rutu Pauto ira raga ita Tootoo Ovoi rutu vituaro.

²¹Kakae vure oaa, ora vatatopo iraopata voeaopa riro kuuvu irara pau irara ora varao kuuvu siposiporo. Oara evara uvuipai ra Pauto vo tavukiaro ouve vo visii iava sopaura oavisii-ia.

Eisivi raga osa vo pasio purapaavoi visiipa. Ra opesipe.

^w 5:16 Je 5:15; Hi 6:4-6; 1 Ko 11:23-32